

LA QUOTIDIANA

FMR Fundaziun Medias Rumantschas, Via da Masans 2, 7000 Cuirra, 081 544 89 11, redacziun@fmr.ch



In onn da record per l'Arena Alva

La grupp Arena Alva da Laax ha surpassà il cunfin da 100 milliuns francs svieulta.

Pagina 4



Dus novs vehichels en il Vereina

La Viafier retica ha preschentà dus novs vehichels per situaziuns d'urgenza en il tunnel dal Vereina.

Pagina 2

FMR FUNDAZIUN MEDIAS RUMANTSCHAS



SURSELVA

Ina stad d'alpegiaziun turbulenta

Enquala alp ha gia scargau e las biaras vegnan a far quei ils proxims gis. Pil persunal eis ei stau ina stagiun stentusa. Cunzun per pasturas e pasturs d'animals manedels. Ed era pils veterinaris. Quels ein vegni clamai da tuttas uras e cuntinuadamein. Inagada pervia da malsognas, lu cunzun pervia dils lufs. En pliras alps han quels caschunau in caos e malsegirtad sco aunc mai. *Fadri Vincenz* ei in dils veterinaris ch'ei staus confruntaus trasora cun tals cass. El giavischass dalla politica da reagir pli spert e d'eliminar lufs che penetreschan cuntinuadamein en muntaneras. Tenor Vincenz ston ins reponderar las metodos da pertgirar ed alpegiar nuorsas. Autruisa seigi ei grev d'anflar persunal, manegia il veterinari da Vella ell'intervesta culla FMR. (fmr/abc)

Pagina 5

GRISCHUN CENTRAL

«La spetg pitost ena tgatscha mediochra»



Igl domber da tschervs an Surses è sa redutgia. En fatg tgi pudess influenzer la tgatscha 2022.

FOTO GENI BALLAT

Sonda ò scumanzo per *Armando Janett* igl taimp igl pi intensiv digl onn, chegl cun deis da lavour da 12 anfignen 16 ouras. Igl guardiaselvaschigna controlllescha schi las leschas da tgatscha vignan risguardadas an Surses. Pinavant registrescha el igls animals mazzos. Anvers la FMR ò el detg tg'el spetga an general pitost en tgatscha mediochra. En muteiv persiva è tg'igl domber da tschervs è sa redutgia an Surses siva dalla stad 2021. En effect positiv sen la tgatscha pudess dantant aver l'erva bregna e setga suraint tgi procura per daple travagl. E pertge tgi er igl louf pudess influenzer la tgatscha a moda positiva ò el tradia ainten l'intervista cun la FMR. (fmr/sab)

Pagina 8

GRISCHUN

Nov parlament cun nov vent?

Sonda è ida a fin l'emprima sessiun dal Cussegl grond en ses nov «vestgi» – 55 novas deputadas e deputads sesan ussa en il parlament grischun cun totalmain 120 sezs. La nova constellaziun para da purtar er in nov vent en la sala dal Cussegl grond, sco ch'il redactor da la FMR, *Martin Gabriel*, remartga en ses commentari per la fin da quest'emprima sessiun. Ils puncts centrals da quella sessiun èn stadas la lescha davart il traffic public e la revisiun da la lescha da persunal per l'administraziun chantunala. Ma il punct culminant è stada senza dubi l'elecziun e la festa per il nov president dal Cussegl grond, per *Tarzius Caviezel*. (fmr/dat)

Pagina 2-3

Üna malatia da tropas in Val Müstair?

Da la leptospirosa – insè üna malatia da tropas – vegnan adüna darcheu diagnosticats cas illa Val Müstair. Theodor von Fellenberg, schefmeidi dal Center da sandà Val Müstair, vuol gnir a savair quant frequent cha la malatia es illa populaziun da la val.

MARTIN CAMICHEL/FMR

Daspö quist on ha lö ün stüdi dal Center da sandà Val Müstair – in collavuraziun cun l'Ospidal da l'Università Basilea – chi vuol scuvrir quant frequent cha'ls anticorpuls da trais malatias sun illa populaziun da la Val Müstair. Impustüt la leptospirosa sta i'l center dal stüdi: *Theodor von Fellenberg*, schefmeidi dal Center da sandà Val Müstair e meidi da tropas, suppuona cha bler daplü glied fetscha tras quista malatia – ma na greivamaing. «La leptospirosa es però in mincha cas plü mortala

«La leptospirosa es in mincha cas plü mortala co la viroula da schingias.»

Theodor von Fellenberg, schefmeidi Center da sandà Val Müstair

co la viroula da schingias. E scha la leptospirosa es uschè frequent sco ch'eu suppuon, lura es ella eir plü privlusa co la viroula da schingias», declera Theodor von Fellenberg. Ils prüms trais cas sun gnüts diagnosticats illa Val Müstair dal 2014. Ils stüdi chi düra duos ons dess sclerir quantas persunas chi s'infetteschan in quel temp cun leptospiras. Implü as voula eir gnir a savair, quant lösch chi's po cumprovar ils anticorpuls da las leptospiras i'l sang. Il schefmeidi ha dat sclerimaint invers la FMR areguard la malatia e'l stüdi actual.

Pagina 7

«Nus essan sco pumpiers che stizzein fugs, adina essan nus dus pass anavos.»

Il veterinari *Fadri Vincenz* raquinta davart ses mintgadi en connex cun il luf. – Pagina 5



FOTO LIVIA MAUERHOFER

Il cumponist da e per tuts

Mardis cumpleness el siu 87avel anniversari. Gion Antoni Derungs ei denton morts avon diesch onns, ils 4 da settember 2012. Per commemorar quei ha la Fundaziun Gion Antoni Derungs dedicau la fin d'jamna vargada in festival da musica ad el. Siat concerts han manifestau sia prestaziun e sia muntada. Gion Antoni Derungs seigi staus in cumponist da tuts ed in per tuts, han ins udiu a caschun dil concert digl ensemble ö! el Teater Cuera. (fmr/abc)

Pagina 4



1 0036

Servetsch d'abunents e da distribuziun: tel. 0844 226 226 mail: abo@somedia.ch

9 771424 749004